

EAEG bukan badan eksklusif

18 MAY 1991

KUALA LUMPUR, Jumaat — Kumpulan Ekonomi Asia Timur (EAEG) yang sedang dibincangkan oleh negara Asean sekarang tidak akan menjadi kumpulan eksklusif, tetapi forum perbincangan ekonomi serantau bagi mengekalkan perdagangan bebas.

Perdana Menteri, Datuk Seri Dr. Mahathir Mohamad, berkata negara membangun seperti di Eropah Timur dan Tengah yang sedang cuba mengintegrasikan ekonomi di peringkat antarabangsa, tidak perlu bimbang rantau ini ditutup kepada mereka.

"EAEG akan berusaha memaksimumkan peluang perdagangan di kalangan ahli serta negara lain," katanya di majlis makan malam meraikan Perdana Menteri Republik Persekutuan Czech

dan Slovak, Dr Marian Calfa di Sri Perdana di sini, malam ini.

Menurutnya, usaha bersama negara Asean itu bertujuan meningkatkan kerjasama ekonomi dua hala dengan harapan akan menjadi jambatan memperluaskan hubungan ekonomi antara Eropah Timur dan Tengah dengan negara di rantau Pasifik.

Perdana Menteri berkata, perubahan besar di Eropah Timur dan Tengah membuat Malaysia mengkaji semula perhubungannya dengan negara rantau itu.

Katanya, sekatan perjalanan akan dilonggar dan diselaraskan dengan peraturan yang digunakan di negara Eropah Barat.

"Lebih banyak pertukaran perdagangan dan perniagaan sedang dirancang bagi membiasakan sek

LIHAT MUKA 2

Insentif untuk pelaburan luar negara

18 MAY 1991

tor swasta negara ini dengan suasana baru perdagangan dua hala dan pelaburan di Eropah Timur dan Tengah," katanya.

Sehubungan itu, katanya, Belanjawan 1991 menyediakan insentif kepada ahli perniagaan yang melabur dalam projek di seberang laut.

Mengenai perdagangan bebas, Datuk Seri Dr Mahathir berkata, Malaysia diberitahu mengenai kebaikan perdagangan itu apabila mencapai kemerdekaan dan hampir berseendirian di kalangan negara yang baru merdeka.

Bagaimanapun, katanya, Malaysia enggan memiliknegarakan syarikat perniagaan asing, tetapi membuka pasaran kepada eksport seluruh dunia serta menggalakkan lebih banyak penyertaan asing dalam ekonomi negara.

"Malaysia tidak pernah menyekat pengaliran keluar masuk matawang asing. Justeru itu, pasar raya dan kedai negara ini dipenuhi dengan barangan dari seluruh dunia," katanya.

Datuk Seri Dr Mahathir juga berkata, Malaysia tidak boleh membeli tanpa menjual sehingga untuk membeli barang pembuatan yang sama, terpaksa menjual lebih banyak lagi komoditi seperti getah dan timah.

Beliau berkata, komoditi dan barangan pembuatan negara tertakluk kepada perdagangan tidak adil, termasuk sekatan yang kononnya disebabkan Malaysia tidak mengamalkan hak kemanusiaan, pencemaran alam sekitar, dasar buruh dan publisiti yang tidak adil.

"Pengalaman kami tidak ada benda seperti perdagangan bebas. Perdagangan hanya bebas apabila negara menjadi pasaran, tetapi apabila kita ingin memasuki pasaran negara kaya, perdagangan itu tidak lagi bebas," katanya.